

Roemah Klienteng di Kansu.

Kansu, jang terletak di Tiongkok oetara-barat, besarnya 125,000 mijl pesegi dan ada satoe dari Tiongkok poenja provincie-provincie jang paling besar — teritoeng No. 3 dalem hal kaloeasannja. Provincie di Tiongkok sedjati jang paling loeas ada Szechuan (218,500 mijl pesegi) dan No. 2 ada Yunan (146,700 mijl pesegi).


Maski daerahnya begitoe loeas, pendoedoek dari itoe provincie ditaksir tjoemah sapoeloeh millioen djiwa lebih sedikit, hingga ia ada teritoeng salah-satoe provincie jang pendoedoeknya paling sedikit dan paling koerang padet, terdiri kabanjakan dari bangsa Monggoel dan Tanggut, dan sabagian jang paling besar ada beragama Islam.

Oleh kerna itoe maka di Kansu tida terdapat klen-teng-klen teng Tionghoa koeno, besar dan indah, apalagi lantaran disana doeloean sering terjadi pembrontakan dan peroesoehan jang membinasaken banjak djiwa dan memoesnaken kota-kota sampe rata dengan tanah. Gambar di sabelah ini meloekiskien salah-satoe klen teng di Lanchoufu, iboekota dari itoe provincie, dan pendoedoeknya ditaksir satengah millioen djiwa, teritoeng satoe dari kota-kota jang paling besar di Tiongkok oetara-barat.

Berhoeboeng dengen peperangan sama Japan sekarang ini, Kansu menjadi satoe dari provincie-provincie jang paling penting, lantaran disitoe ada terletak djalan besar satoe-satuenja boeat berhoeboeng dengan Sinkiang atawa Turkestan Tiongkok jang berwates dengan Rusland. Segala alat perang dan laen-laen jang Tiongkok terima dari Rusland selaloe di angkoet dengan ambil djalan melaloei Sinkiang dan Kansu.

Berhoeboeng dengen rentjana-pembela'an dan pemindahan rahajat dari provincie-provincie jang diserang oleh Japan, boleh djadi Kansu, sabagi djoega laen-laen provincie di selatan-barat jang sakean lama

koerang diperhatiken, bakal dapet kamadjoean pesat, pendoedoeknya banjak bertambah, sedeng industrie dan laen-laen peroesaha'an aken dibikin madjoe. Dan berbareng dengan pemindahan dari pendoedoek Tionghoa jang berdjoembah besar, boleh diharep agama Buddha poen aken mendjalar dengen tjepeit dalem itoe provinie jang, lantaran letaknya di tengah-tengh antaran Thibet dan Monggolie, ada lebih gampang kamasoekan pengaroeuh dari Buddhisme.



Satoe klenteng Tionghoa di Lanchoufu, ibukota dari provinie Kansu.

Sam Kauw Gwat Po.

三教月報

ORGAN DARI BATAVIA BUDDHIST ASSOCIATION,
SAM KAUW HWE BATAVIA, MENADO,
DAN TELOKBETONG.

ISINJA INI MAANDBLAAD ADA DIOEROES DAN DITANG-
GOENG OLEH REDACTIE „MOESTIKA DHARMA.”

Harga abonnement per kwartaal f 0,75 Pembajaran dimoeka
Kaloe berlangganan dirangkep sama Moestika Dharma atawa
Moestika Romans boeat ini maandblad tjoemah tambah per-
kwartaal f 0,50. Harga advertentie boleh berempoek.

Kantoor Redactie Administratie: Tjitjeroeg, Preanger.

Tindak-tindakan Pertama boeat berdiriken satoe Sam Kauw Hwe.

Kapan satoe orang merasa adanja pakoempoelan kabatinan samatjem Sam Kauw Hwe dengen sasoeng-goenja sanget perloe, baek dan berfaedah, dan ia sendiri dengen ichlas dan soedjoet hendak bekerdja oentoek ini gerakan dengen kawan-kawan jang bersatoe maksoed atawa, kaloe perloe dan terpaksa, dengen sendirian sadja, serta bersedia aken hadepken segala rintangan dengen hati sabar, dan boeat ini pakerdja'an ia tida pikir apa-apa oentoek dirinja sendiri hanja meloeloe boeat menjarken kabaekan dan pererangan, oentoek orang banjak jang soeka perhatiken pelajaran batin, — lants ia poen boleh moelai laloeken tindakan pertama aken woedjoetken angenganneija itoe.

Menoeroet kabiasaan oemoem, kapan orang hendak berdiriken satoe pekoempoelan terlebih doeloe ia berempoek dengen beberapa kawan jang, kapan

soedah menjataken setoedjoe, laloe berame adaken vergadering dengen ondang orang banjak, di hadepan siapa itoe maksoed laloe diterangkan pandjanglebar dan, kapan vergadering menjataken setoedjoe atawa sabagian besar dari jang hadlir kaliatan maoe menoendjang, laloe ditjatet namanja leden dan terkadang disitoe djoega dipilih satoe bestuur jang tetep atawa poen boeat samentara waktoe (voorloopig). Itoe pemilihan diatober serba compleet, dengen President, Vice President, Adviseur, Eerste dan Tweede Secretaris, Penningmeester, dan beberapa Commissaris jang djoemblahnja terkadang sampe bilang blas, teritoeng djoega kepala-kepala dari berbagi-bagi afdeeling, seperti pengoeroes yanswat, propagandist, dames afdeeling dan laen-laen lagi jang, kapan diliat dari loear, ada diatober serba rapih, lengkep dan sampoerna!

Terkadang kadjadian, satoe pakoempoelan jang tjoemah mempoenjai 30 lid, bestuurnja terdiri dari 25 orang! Kaloe itoe lima, jang tida masoek ka dalem golongan Bestuur, kaliatan soeka nimbroeng dan sering „menjataken pikiran,” bisa djoega samoeanja dipilih djadi lid bestuur soepaja iaorang tida djadi koerang senang kapan tida diangkat ka dalem salah-satoe jabatan, tjoemah djadi lid blasa sadja.

Tetapi kapan itoe pakoempoelan soedah bekerdja kira satoe taon lamanja, nanti ternjata jang itoe sakean banjak bestuur leden boekan menggampangken segala tindakan boeat mentjari kamadjoean, hanja djadi gandoelan dan rintangan jang menjoesahken, sebab itoe orang-orang jang disèrèt dan diboedjoek boeat tjampoer satoe gerakan jang marika belon mengarté, tida perna pikirin dan tida saberapa ketarik, soedah tentoe tida bisa bekerdja giat. Ada djoega jang tjoba kasih liat kasoedjoetan dan kagoembirahannja dengen sabentar-bentar madjoeken voorstel-voorstel jang dirasa bisa melekaskken kamadjoeannja itoe gerakan,

TINDAKAN BOEAT DIRIKEN SAM KAUW HWE.

tetapi lantaran belon mengarti baek pada azas-azas dan toedjoean jang sabenernya, maka itoe haloean kabanjakan menjasar, hingga menimboelken tjomeilan dan perbantahan antara sasama leden, dan sering-kalih si giat tadi laloe mengamboel dan oendoerken diri.

Boeat satoe pakoempoelan kabatinan, apalagi jang toedjoeannja hendak fahamken dan siarken peladjaran philosophie jang tinggi, ada sanget tida practisch aken tarik ka dalem bestuur orang-orang jang belon pernataro perhatian pada kabatinan, biarpoen bagimana giat, pande, radjin dan terpandang djempol dalem siahwe. Kapan ia maoe bekerdja giat, itoe kagiatan kabanjakan menoedjoe ka djoeroesan laen dari-pada kabatinan, dan ia nanti goenaken pengaroeh dan kapandeannja boeat bikin itoe pakoempoelan poenja toedjoean berubah begitoe roepa hingga tida berbeda dengan laen-laen gerakan amal atawa kong-ek oemoem. Begitoelah ada pakoempoelan kabatian jang berkoetetan boeat boeka roemah sekola, menderma pakean toea oentoek orang miskin, malah ada djoega Khong Kuaw Hwe jang poengoet oeroenan boeat menoeloeng pendoedoek di Japan koetikn itoe negri kelanggar gempah boemi besar di taon 1923. Soeal adaken lezing jang tetep, bikin propaganda jang beres, adaken bibliotheek jang lengkep, dan laen laen tindakan jang penting dan tjojok dengan toedjoeannja itoe gerakan, achirnya koerang diperhatiken, kerna tenaga dan pikiran dari besturnja lebih banjak ketarik pada laen-laen pakerdja'an jang, maskipoen „baek“, boekan djadi toedjoeannja jang teroetama.

Maka itoe saban kalih satoe pakoempoelan kabatinan moelai menjimpang dari garisan dengan riboetin sadja segala oeroesan jang biasa dikerdjain oleh laen-laen pakoempoelan amal, boleh dipastiken ka-dqedoekannja moelai gondjet dan deket goeloeng ti-

ker, kerna bestuurnja soedah bosen dan ingin toeker haloean jang lebih populair dan memberi kasempatan aken bikin reclame, kerna ada banjak pemimpin-pe-mimpin pergerakan Tionghoa jang pandang paker-dja'an kong-ek tjoemah samatjem tooneel aken kasih oendjoek diri di hadepan orang banjak.

Ini matjem penjakit bisa menoelar djoega pada pakempoelan kabatinan kapan di antara bestuurnja ada terdapat orang-orang jang boekan perhatiken pokok toedjoean jang teroetama, hanja lebih perloein bikin reclame, biiek oentoek dirinja sendiri atawa poen boeat itoe pakoempoelan jang marika pimpin. Ini kagandilan tida nanti bisa kadadian djikaloe bestuurnja terdiri dari orang-orang jang soeka perhatiken dan taro harga pada itoe peladjaran jang hendak disiarken, biarpoen tjoemah terdiri dari doea tiga orang sadja.

Maka itoe kapan hendak berdiriken Sam Kauw Hwe orang tida haroes bertindak satjara biasa. Tida perloe terboeroe-boeroe tjari ledén dan angkat bestuur, kerna itoe samoea gampang dioeroes belakangan kapan itoe gerakan soedah berdjalan dengan tetep menoeroet ka'ada'an jang sawadjarnja, boekan dibikin kaliatainja besar dan madjoe dengan reclame jang saliwatan atawa goenaken roepa-roepa penarik jang melahirken kamadjoean palsoe dan poera-poera.

Djadinja itoe Sam Kauw Hwe poenja tindakan pertama moesti berlaenan dari kabiasaan oemoem. Pendiri-pendirinja traoesah kesoesoe aken dongengin, boedjoek dan sèrèt-sèrèt orang banjak soepaja soeka menoendjang; traoesah iboek aken adaken vergadering besar dan pilih bestuur, hanja boleh moelaé dengan tjari beberapa kawan jang bersatoe toedjoean aken bersama-sama fahamken itoe peladjaran jang hendak disiarken pada orang banjak.

Biarpoen itoe pendiri-pendirji soedah mempoenjai

TINDAKAN BOEAT DIRIKEN SAM KAUW HWE.

banjak pengartian, masih moesti ada apa-apa jang marika haroes peladjarin lebih djaoe, apalagi djikaloe hendak bikin propaganda di moeka oemoem. Dan kagagalan dari kabanjakan pakoempoelan kabatinan adalah lantaran pemimpin-pemimpinnya, jang moesti siarken itoe peladjaran pada laen orang, sendirinjya masih koerang mengarti atawa pengataoeannja terlaloe rendah boeat bisa beriken chotbah jang djelas dan menarik. Dari sebab saorang pitjak tida nanti bisa toentoen dan oendjoekin djalan pada orang-orang boeta, maka ada perloe sekali h sabelonnja bikin pergerakan satjara loeas itoe orang-orang jang djadi pendiri dari Sam Kauw Hwe beladjar lagi dengen giat boeat tambahan pengataoeannja sendiri. Ini bisa dilakoeken dengen bikin perlemoean, oepamanja satiap minggoe satoe kalih, dalem roemahnja salah-satoe antara marika, aken fahamken atawa roendingken itoe peladjaran, dengen satjara studiekclas.

Sabagi bahan dari itoe pemahaman dan peroendingan, lebih doeloe haroes disedia boekoe-boekoe jang tjotjok dengen itoe maksoed boeat dibatja bergantian antara itoe kawan-kawan, jang sambil membatja haroes tjatet bagian-bagian jang dirasa perloe dibilitaraken dalem itoe pertemoean soepaja bisa didjelaskan maksoednya, dipetjahken apa jang samar, atawa boeat oendjoek kafaedahan dan kabagoesannja. Pendapatan atawa pemandangan dari beberapa orang tentoe sekalih ada lebih loeas dari-pada djikaloe tjoemah membatja dan menimbang sendirian. Dengan ini tjara, beladjar lebih doeloe sabelonnja bikin penjiaran di moeka oemoem, marika djadi atoer persedia'an rapih jang membikin itoe gerakan ada lebih banjak kans aken berhatsil sebab mempoenjai fondament jang koeat.

Goena sampeken ini toedjoean perloe sekalih diadaken satoe bibliotheek, dimana aken dikempoel

segala boekoe-boekoe dan madjallah-madjallah jang tjotjok goena itoe maksoed, jang sabenernja tida soesah diwoedjoetken kaloe sadja bisa didapet beberapa blas orang jang soeka mengaloeasken beberapa pitjis satiap boelan sabagi contributie dengen boleh balja itoe segala boekoe dan madjallah dengen pertjoemah.

Tindakan kadoea, kapan itoe pakoempoelan soedah mempoenjai sadjoemb!ah boekoe, adalah boeat mentjari orang-orang jang soeka djadi lid pada itoe biliotiek jang saboleh-boleh contributienja dibikin rendah. Pada orang-orang jang soeka perhatiken kabatinan, tapi tida koeat membajar contributie, boleh dikasih batja itoe boekoe-boekoe dengen pertjoemah, boeat maksoed mana boleh digoenaken namanja salah-satoe lid boeat toeloeng pindjemin. Pendeknya itoe propaganda Sam Kauw dengen menggoenaken boekoe dan pembatja'an haroes disiarken saloeas-loeas-nja dalem itoe tempat dimana Sam Kauw Hwe hendak bekerdja, soepaja orang banjak djadi kenal dan mengarti apa adanya, bagimana sifat dan toedjoeannja itoe Tiga Matjem Agama jang Sam Kauw Hwe hendak siarken.

Itoe pertemoean ketjil dengen sedikit kawan jang tjotjok dan satoe haloean, jang diadaken pada satiap minggoe, perlahan-perlahan bisa dibikin lebih loeas dengen ondag boeat toeroet hadlir beberapa orang loear jang kaliatan ketarik atawa bisa mengarti pada itoe peladjaran. Goena ini maksoed ada perloe pemimpin-pemimpin Sam Kauw Hwe adaken tempo boeat bikin koendjoengan pada sobat dan kenalannja, teroetama pada orang jang kaliatan giat membajra, boeat saling toeker pikiran. Ini propaganda di roemahan ada banjak lebih berfaedah dari pada lezing di moeka oemoem, kerna dalem itoe koendjoengan satjara sobat orang merdika aken toeker pikiran, madjoekan

TINDAKAN BOEAT DIRIKEN SAM KAUW HWE.

perlanka'an dan beroending pandjang-lebar, sedeng di moeka oemoem ada banjak orang jang tinggal boeng-kem kantaran tida biasa dan koeatir salah-omong.

Kapan itoe bibliotheek soedah berdjalan baek dan itoe pertemoean minggoean, dalem kalangan berwates, kaliatan semingkin banjak jang soeka koendjoengin atawa djoemblahnja orang jang hadlir tida merosot, baroelah diambil tindakan katiga aken adaken lezing di hadepan leden dari itoe leesbibliotheek Sam Kauw Hwe. Dengan begitoe djadinja boleh dihirep sekalian jang dateng mendengerin itoe lezing, sedikit atawa banjak, bisa mengarti apa jang dibilitjaraken. Kapan ini pertemoean boelanan antara leden dari itoe bibliotheek ternjata bisa berdjalan dengan tetep, boleh madjoe lagi satoe tindak lebih djaoe dengan adaken pemilihan bestuur jang tetep, diambil antara orang-orang jang sering koendjoengin pertemoean minggoean dan leden dari itoe leesbibliotheek.

Dengan ini tjara tida bisa kadjadian poelah saorang jang tida soeka perhatiken kabatinan dan tida taro sympathie pada itoe gerakan, ditjokolin sabagi lid bestuur. Jang dipilih tjoemah orang jang terboekii hagiatannja boeat tahamken peladjaran Sam Kauw dan soeka batja boekoe-boekoenna.

Sampe disini tida soesah aken ambil lagi tindakan lebih djaoe, jaitoe adaken satiap boelan satoe *openbare lezing* jang boleh dihadlirin oleh *segala orang* dan *segala bangsa*. Ini lezing-lezing besar boleh dihirep selaloe ada jang dateng denger sebab mempoenjai beberapa lapis fondament tegoh. Pertama itoe orang-orang jang bikin lezing tida nanti gampang mengatjo dan menjasar lantaran soedah fahamken dengan giat itoe peladjaran sabelonnja disiarken. Kadoea, soedah ada sedia beberapa orang jang biasa dateng di itoe pertemoean satiap minggoe, dan tentoe aken hadlirin djoega itoe lezing-lezing openbaar. Katiga, ada lagi

leden dari itoe lees-bibliotheek jang nanti perloein dateng hadlir kerna soedah kenal itoe peladjaran jang bakal dilezingken. Maka sekalihpoen perhatian dari fihak loear tjoemah sedikit, atawa tambah lama menjadi semingkin koerang, toch ini gerakan tinggal *ber-djalan teroes* kerna soedah ada sadjoemblah „orang dalem“ jang ketarik dan soeka taro perhatian dengan soedjoet hati.

Ada banjak pakoempoelan kabatinan jang besturunja merasa girang, besar hati dan sangat goembirah, koetika pertama kalih adaken lezing oemoem dikoen-djoengin oleh banjak sekalih orang, hingga marika lantes mengimpi jang itoe pakoempoelan bakal berdiri tegoech dan dapet toendjangan tjoekoep dari publiek jang merasa „sangat ketarik.“ Dari saking girang dan bangganja, sering djoega kadjadian dalem satoe pertemoean ada sampe toedjoeh atawa delapan orang naek di podium dan bikin lezing ganti-berganti, boeat djedjelin itoe peladjaran sabanjak-banjaknja ka koeping orang jang berhadlir sampe marika djadi *begah* dan *kenjang*, sebab di antara itoe spreekers ada djoega jang belon betjoes bitjara dengen rapih tetapi maoe tetoeroetan *nimbroeng*, hingga bikin djemoe pada pendenger, jang merasa kesel kerna terpaksa doedoek beberapa djam boeat dengerin segala pidato tida karoean djoentroengannja, dari itoe orang-orang jang belon ada pengartian dan kamam-poean boeat berchotbah.

Sabedoelna jang sakoe antara itoe sakean banjak pendenger sabagian paling besar tjoemah dateng boeat menonton, sakedar „kapingin taoe“ sadja. Memang biasanya kapan ada vergadering oemoem boeat satoe gerakan baroe, jang bisa disaksiken dengen perijsomah, apalagi djikaloe diondang, ada banjak djoega jang ketarik boeat saksiken. Tapi kapan soedah mendengerin satoe doe a kalih apa jang dilezingken, apalagi djika-

TINDAKAN BOEAT DIRIKEN SAM KAUV HWE.

Ioe daptken itoe pemitjara'an tida karoean djoentroengannja, iaorang tida soeka dateng lagi, hingga tambah lama djoembahnja jang hadlir djadi semingkin merosot. Oepama koetika pertama kalih diadaken lezing jang berhadlir 300 orang, kapan soedah berdjalan kalima kalihnya lantes merosot sampe tinggal 30 glintir. Ini dipandang sabagi *kamoendoeran*, dan bestuur dari itoe pakoempoelan jang doeloean begitoe goembirah, sekarang djadi koentjoep dan males-malesan, kerna anggep itoe gerakan *soedah gagal*, hingga tida bergenra tjapein hati lebih djaoe. Sabetoelnja itoe tilga poeloeh orang jang hadlir ada djoembahlah jang sawadjarnja, terdiri dari orang-orang jang mentang soeka sama kabatinan, sedeng itoe rombongan besar jang hadlir pertama dan kadoea kalih tjoemah dateng bqeat iseng-iseng aken menonton sadja. Djadinja kapan dipandang dari sini, itoe kamerosutan boekan berarti *kamoendoeran* hanja ada tjetjok sama tenaga dari itoe gerakan jang tjoemah bisa bergerak dalem kalangan berwates, lantaran di mana-mana tempat tjoemah sedikit sadja orang jang soeka perhatiken philosofie kabatinan.

Ini matjem „pertoendjoekan” jang „gagal” tida nanti terjadi djikaloe orang tida keliroe ambil tindakan dengan boeroe-boeroe bikin lezing-lezing di moeka oemoem zonder atoer persedia'an dan pasang fondament jang teggeh dan rapih lebih doeloe. Kamadjoean dari pergerakan kabatinan jang sawadjarnja moesti moelai dari ketjil lebih doeloe aken komedian membesarin dengan perlahan, boeat mana pamoeka-pamoeka dari itoe gerakan haroes bekerdja dengan giat, oelet dan sabar.

Khong Tjoe dan Buddha.

(Lezing di Kgenteng Kwan In Tong, Batavia, pada hari Kemis tanggal 27 Peegwee = 20 October 1938, djam 8 sore).

OLEH KWEE TEK HOAIJ.

Soedara-soedara,

Kabetqelan di ini hari ada hari peringatan dari kahirannja Khong Tjoe, maka sekarang saja toenda itoe lezing tentang Buddha poenja Delapan Djalān Oetama, dan aken gantinja saja maoe bitjarakei lagi perbandingan atas peladjaran dari Khong Tjoe dan Buddha.

Beberapa katjotjokan atawa kamiripan dari peladjarannja ini doe Sengdin saja soedah perna lezingken pada kira-kira tiga taon jang laloe. Tapi penjelidikan jang saja lakoeka dalem tempo belakangan atas ini doe peladjaran membikin saja dapat liat lagi beberapa persama'an jang menarik hati dan ada berharga boeat diroendingken lebih djaoe. Memang betoel kapun dipandang dari sabelah loear, dan diambil kasarnja itoe pendirian dan pokok-dasar dari peladjarannja itoe doe Sengdin, antara Khong Kauw dan Hoed Kauw ada terdapat perbedaan sanget djaoe. Ini Kadjaean djadi semingkin bestambah poela lantaran Agama Buddha di Tiongkok, jang termasoek pada golongan Mahayana, ada ketjampoeran dengan kapertjaja'an dari Thibet dan ditambah sama penjipta'an dari bangsa Tionghoa sendiri seperti itoe pamoedjaan pada Kwan Im dan laen-laen lagi. Sembahjangan Reboetan, oepatjara Buddhist jang paling besar, berikoet kapertjaja'an tentang Naraka dan adanja Negri Kaberkahan di Barat jang dipandang sebagai kaoem Buddhist poenja „sorga”, sama sekali tidak terdapat di dalem Khong Kauw, sedeng peladjaran tentang Toemimbal Lahir, Karma dan sabaginja lagi, jang sanget dioetamaken dalem Buddhisme, boleh dibilang

LEZING-LEZING DI KWAN IM TONG.

belon perna dikamoekaken oleh Khong Tjoe, jang hanja oetamaken peladjaran tentang kaboedian (moraal) dan peratoeran hidoep jang baek antara sesama manusia. Aken tetapi kapan orang singkirken itoe doe peladjaran poenja segala perhiasan dan boengkoesan sabelah loear, nanti kadapetan banjak bagian dari Buddha dan Khong Tjoe poenja peladjaran philosophie jang begitoe deket hingga kapan orang ikoetin dengan betoel, penganoet-penganoet Khong Kauw dan Buddhist achirnja bisa bertemoe satoe dengan laen dalem marika poenja perdjalanan mentjari kasoeijian. Dan malah di djaman Song Tiauw ada banjak sastrawan-sastrawan Khong Kauw jang fahamken Budhhisme dengan soenggoe-soenggoe soedah dapat pemandangan baroe tentang peladjaran Khong Tjoe jang didasarken atas Budhhisme. Dalem boekoenja „Negrikoe dan Bangsakoe” (*My Country and my People*), Dr. Lin Yu Tang, dalem pagina 118 ada bilang, maskipoen Budhhisme tida bisa bikin itoe sastrawan-sastrawan Khong Kauw djadi penganoetna Buddha, tapi telah menimboelken perobahan atas tjaranja memberi artian pada Khong Tjoe poenja peladjaran. Di laen bagian dari itoe boekoe, fatsal *The Chinese Mind* (Pikirannja orang Tionghoa), Dr. Lin Yu Tang ada bilang : „The Sung philosophers reinterpreted Confucianism in the light of Buddhism, and transformed it into a system of mental discipline and moral hygiene.” (Achli-achli-pemikir dari djaman Song Tiauw soedah ambil artian baroe tentang Khong Kauw dengan berdasar atas keterangan dari peladjaran Buddha, dan merubah itoe peladjaran dari Khong Tjoe mendjadi satoe atoeran bosat mendidik batin dan membersihken mōraal).

Dengan begitoe, soedara-soedara, kita bisa liat, bagaimana pada djaman dinastie Song (jang berkoeasa di Tiongkok dari taon 960 sampe 1278), pada djaman mana ada hidoep Chu Hsi (Tjoe Boen Kong) dan

laen-laen sastrawan jang termashoer, soedah terjadi perobahan dalem hal membaci artian atas peladjaran Khong Tjoe dengen berdasar pada keterangan-keterangan jang didapet dari Buddhisme, hal mana ada menoendjoekken bahoea itoe doeа peladjaran poenja sari atawa lapisan sabelah dalem sabetoelnya ada deket satoe sama laen. Pengabisan, dalem pagina 98 dari itoe boekoe, Dr Lin Yu Tang bilang : „Buddhisme itself, when absorbed by the educated Chinese, became nothing but a system of mental hygiene, which is the essence of Sung philosophy.“ (Agama Buddha sendiri, kapan soedah masoek ka dalem pikirannja orang Tionghoa jang terpeladjar, tjoemah djadi sadja satoe peladjaran dari kabersihan batin, jang djadi sari dari philosophie-nja itoe achli-achli pemikir dari djaman Song Tiauw).

Dengen begitoe kita bisa liat, haloean jang diambil oleh kita poenja Sam Kauw Hwe, aken tida mementingken itoe segala oepatjara dan atoeran jang menjadi koelit lapisan sabelah loear, hanja perhatiken sadja sari dari peladjarannja itoe Tiga Agama atawa Sam Kauw (Khong Kauw, Hoed Kauw dan Too Kauw) ada tjotjok seperti apa jang soedah dilakoeken oleh achli-achli-pemikir di Tiongkok pada delapan atawa sembilan abad laloe, jang soedah dapat liat bahoea peladjaran Khong Tjoe bisa djoega diartiken dengen berdasar atas keterangan dari peladjarannja Buddha, kerna lapisan sabelah dalem dari ini doeа agama, djikaloe tida tjotjok betoel, sedikitnya *tida bertentangan* satoe sama laen.

Soedara-soedara jang soedah perna batja *Omongan tentang Agama Buddha* serie Ka'anem, dalem mana ada terbeber Buddha poenja atoeran peladjaran boeat menambahin pri-kabaakan, tentoe bisa liat djoega bagimana antara itoe sapoeloeh sifat baek jang Buddha oendjoek, *Pri Dermawan* ada ditempatken

LEZING-LEZING DI KWAN IM TONG.

paling pertama. Inilah ada tjotjok dengen Khong Tjoe poenja NGO SIANG, dimana sifat DJIN, jaitoe welas-asih atawa katjinta'an pada sasama manoesia, ada dipernaken paling atas dari jang laen-laen. Djoega dalem Buddha poenja atoeran tentang perhoe-boengan dan kawadjiban antara sasama manoesia, itoe kawadjiban dari iboe bapa terhadep anak-anaknya dan anak-anak terhadep iboe-bapanja, ada dipernahken paling doeloe. Kalakoean anak pada iboe bapanja oleh Buddha ada diatoer dalem ampat fatsal :

1. Melindoëngin ajah dan bonda.
2. Lakoeken segala kawadjiban jang perloe terhadep marika.
3. Mendjoengdjoeng kahormatan dari familie.
4. Lakoeken oepatjara pengoeboean jang pantes kapan marika meninggal doenia.

Maski ini atoeran kaliatannja amat ringkes, tetapi di dalemnya ada terboengkoes segala apa jang terdapat dalem kaoem Khong Kauw poenja *Hauw*; seperti itoe kawadjiban boeat „melindoëngin ajah dan bonda“, disitoe ada termasoek djoega segala kaharoesan aken tjoba bikin orang-toea djadi merasa senang, selamet, beroentoeng dan bergirang, saberapa boleh terdjaoe dari kasoekeran, kasangsara'an, kadoeka'an dan kakeatiran atawa poen kahina'an. Ini maksoed lebih gampang tertjapei kapan sang anak „lakoeken segala kawadjiban jang perloe terhadep marika“ dan „mendjoengdjoeng kahormatan dari familie.“ Dalem hal mendjoengdjoeng kahormatan dari familie ada termasoek djoega kamoestian aken sang anak berlakoe bedjik, berdjalan bener dan beroesaha aken dapatketi pengataoean jang berfaedah, sebab dengen berboeat begitoe ia bikin iboe-bapa dan leloehoernja, jang masih hidoeper atawa poen soedah mati, mendapat *nama baek* dan *haroem*.

Tetapi jang paling menarik adalah itoe fatsal 4.

boeat lakoeken oepatjara mengoeboer satjara pantes kapan iboe-bapa meninggal doenia, soea manadjoestroe ada sanget dioetamain oleh Khong Tjoe. Ada penting aken diperhatiken, Buddha tida bilang tjara bagimana itoe oepatjara pengoeboeran haroes dilakoe-ken, sebab Buddha sampé mengarti jang sassœatoe bangsa ada poenja oepatjara dan adat-kabiasa'an sendiri jang dalem negrija dianggep „pantes.“ Dari sebab Buddhisme ada peladjaran dari kabidjaksana'an, boekan samatjem atoeran hidoe jang bersifat koekoech dan pasti, maka tida diadaken atoeran jang koedoe ditteroet oleh samoea penganoetnja, hanja masing-masing bangsa boleh ambil atoeran sendiri dalem hal melakoeken oepatjara pengoeboeran jang dirasa *baek* dan *pantes*. Dan begitoe poen apa jang dinamain sabagi kawadijiban dari anak pada iboe-bapanja, pada masing-masing bangsa ada berbeda'an, maka tida bisa didjelaskan moesti berlakoe bagimana, hanja ada lebih baek orang pake pikiran dan pertimbangan sendiri jang berdasar atas Pengartian Bener dan tida bertentangan dengen iapoенja liang-siem atawa setaoe hati.

Saorang Tionghoa jang soedah masoek Kristen atawa pelok agama Islam, dimoestiken boeat dikoeboer menoeroet atoeran Kristen atawa Islam, tida boleh pake atoeran atawa oepatjara Tionghoa, hal mana membikin familienja jang tida masoek Kristen atawa Islam mendjadi koerang senang. Tetapi saorang Buddhist ada diberi kamerdika'an boeat menggoenaken atoeran sendiri, angsal sadja anak-anak dari jang meninggal merasa „pantes“ atawa tida ketjiwa. Djikaloe anak-anak dan familienja pikir ada *baek* dan *pantes* kaloe itoe majit dibakar menoeroet tjara dari Buddha, itoe poen tida halangan; tetapi djikaloe orang maoe ikoetin oepatjara dan adat-kabiasa'an Tionghoa, aken dikoeboer pake peti, djoega tida melanggar pada peladjaran Buddha, jang tida

LEZING-LEZING DI KWAN IM TONG.

menggoenaken kakoekoehan dalem soeal-soeal sampingan.

Buddha poenja atoerau tentang kawadjiban antara moerid dengen goeroe dan laen-laen lagi, poen ada banjak sekalih jang tjetjok dengen atoeran Khong Kauw, hingga itoe doea peladjaran sabetoelna boleh didjalanken dengen berendeng sama sama.

Di lni malem saja tida hendak beber itoe samoea satoe per satoe, sebab ada terlaloe pandjang, dan lagi orang bisa dapat batja itoe samoea dalem boekoe *Omong-omong tentang Agama Buddha Serie Kanem*; sekarang saja maoe blitaraken sadja itoe katjetjokan jang terdapat dalem kaangan philosophie antara Khong Kauw dan Hoed Kauw, jang soedah dikenalin oleh achli-achli pemikir di Tiongkok sadari di djaman Song Tauw.

Seperti soedara-soedara brangkalih soedah mengarti djoega, toedjoean dari Buddhisme adalah boeat beriken pada manoesia itoe kasedaran jang membikin kita-orang insjaf atawa éling atas sifat jang gabener benernja dari ini kahidoepan, jang penoeh dengan penggoda, gontjangan dan kasangsara'an jang bersifat menginget, dari iketan mana orang haroes berdaja aken lolosken diri soepaja bisa mengindjek itoe Djalanjan jang menoedjoe pada Katentreman Kekel.

Khong Tjoen poen, di dalem *Thay Hak*, ada menoendjoek pada itoe toedjoean achir dari perdjalanan manoesia, jaitoe boeat sampeken tempat berenti di dalem tingkatan jang paling sampoerna (*TJAY TJI IEB TJI SIAN*). Kapan soedali taoe tempat dimana mestii berenti, baroelah orang bisa ambil toedjoean jang tetep dan pasti, dan dengan begitoe bisa didapet katentreman. Itoe katentreman aken diberikoetken dengan pengasoan jang aman; di dalem itoe pengasoan jang aman orang biasa memikir dengan terliti, dan itoe pikiran dan pertimbangan aken diberikoetken dengan

kasampean apa jang di inginken (*Thay Hak* fatsal 2).

Itoe perkataän *Tji Sian* ada berarti „sifat kabaek-an jang paling sampoerna,” ka djoeroesan mana ini penghidoepan haroes dittoedjoeken. Tjoemah kapan orang soedah bisa indjek itoe djalanen jang menoedjoe ka arah kasampoerna'an, baroelah pikirannja mendjadi tetep, terbebas dari segala penarik dan dji-retarinja doenia, tida dipengaroehin lagi oleg kasera-kahan, hingga hatinja tinggal tentrem kerna ia tida kedjer lagi apa-apa jang menggontjangken.

Disini kita bisa liat bagimana Khong Tjoe, sebagai djoega Buddha, ada oendjoek satoe toedjoean jang paling achir (goal atau doel) dari mantesia, jang dinamaken *Tji Sian* dan boleh dibandingin seperti Buddha poenja *Nirwana*, kerna tjoemah bisa disampeken atawa didapetken oleh siapa jang soedah bisa bebaskan diri dari segala gontjangan doenia dengan djalan menindes hawa nafsoe atawa kainginan jang bersifat serakah dan sia-sia, lantaran mana ia achirnya bisa dapat katentreman dan pengasoan jang aman, di dalam kaädaän mana ia bisa menimbang dan memikir dengan terliti hingga apa jang ia maksoedken bisa kasampean.

Ini samoea poen ada djalanen dan daja oepaja jang telah dioendjoek djoega dalem Buddha poenja Delapan Djalan Oetama, dan ada sifat dan kamampoean jang diminta pada marika jang hendak memandjat tingkatan soetji dari kasatoe sampe ka'ampat, Marika jang soedah sampe di tingkatan Arhat, tingkat paling tinggi dari kaoem Buddhist, nanti dapat katentreman penoeh, hingga bisa mengaso di Negri Kabeikahan (*Sukawati, Kik Lok Kok*) jang berada dalem lingkoeng-an *Nirwana*. Betoel Khong Tjoe tida bilang, atawa oendjoek dengan djelas, sifatnja penghidoepan dari saorang jang soedah sampe di itoe „tempat berenti dalem tingkatan jang paling sampoerna“, tetapi kita-orang

LEZING-LEZING DI KWAN IM TONG.

haroes mengarti, apa jang orang bisa terangkan ala-wa loekisken bagimana sifatnya, boekan ada jang paling sampoerna, hanja masih berwates. Apa jang *tida bisa didjadakin* dan *tida berwates* — seperti Loo Tjoe poenja keterangan tentang *Too* — tida ada jang bisa tjeritaken sampe abis satoe per satoe. Malah Buddha sendiri poen tida perna terangken sampe dje-las betoel bagimana sifatnya *toe* Nirwana.

Soepaja lebih gampang aken orang sampeken itoe toedjoean boeat dapetken pri kabaekan jang paling sampoerna, dalem *Thay Hak* fatsal 3 oleh Khong Tjoe ada dioendjoek, soepaja orang beladjar aken mengenalin jang mana *akar* (poko) jang mana *tjabang*, dan apa jang mendjadit *awal* dan *achir*. Ini peladjaran poen ada tjotjok dengen tjara dari Buddha, jang mengasih kenal poko-poko (akar) atawa poen soember dari manoesia poenja segala kasangsara'an jang datengnya lantaran menoeroetin segala nafsoe känginan boeat kedjer atawa pelokin apa jang sia-sia dan tida kekel. Kapan orang soedah bisa mendjalanken itoe *Wiweka*, jaitoe memilih dan mengenalin antara jang bergenena dan tida bergenena, antara jang kekel dan fana, jaitoe jang Khong Tjoe bilang „*akar* dan *tjabang*“ atawa „*awal* dan *achir*“, — disitoelah baroe ia terbebas dari segala karoewetan dan kagontjangan dari kahidoepan, dan bisa ikoetin dengen betoel itoe Djalanen.

Berhoeboeng dengen pengoendjoekan di atas maka Khong Tjoe poedjiken soepaja itoe orang jang hendak menjelametken manoesia sadoenia — jang maoe djadi „oetoesan Toehan“ — terlebih doeloe moesti kenalin baek-baek toedjoeaniha hidoe, dari mana atsal moelahnja dan ka mana achirnja, sebab kapan ini ia soedah mengarti baek, jaitoe jang dibilang „mengataoei achirnja segala benda“ (*Tjay Kek Boet*), baroelah ia bisa sampoernaken pengartian atawa pengataoeannja, jang

komoedian membikin pikirannja djadi djoedjoer dan soetji, hatinja jaloe mendjadi baek hingga bikin dirinja hidoe satjara sampoerna, jang memberi padanja kakoeasa'an dan kapandean mengoeroes roemah tangga, negri dan menjelametken doenia.

Ini soesoenan peladjaran ada mirip dengan Buddha poenja Delapan Djalan Oetama, jang meminta pada orang jang hendak mentjari kasoetjian atawa ketentreman kekel aken lebih doeoe peladjarin Pengartian Bener, lantes Pikiran, komoedian Bitjara, Perboeatan, Penghidoepan, Pertjoba'an, Peringetan dan achirnya Lajangken Pikiran satjara Bener.

Djadinya Khong Tjoe dan Buddha poenja pokok dasar peladjaran boeat dapatken kabaakan jang paling sampoerna atawa tluangkat kasoeetjian jang paling tinggi, boleh dibilang tjotjok saoe sama laen, jaitoe dengan djalan meloeasken pengataoean begitoe roepa hingga bisa insjaf pada toedjoean hidoe dari manoesia, mendjedjoerken atawa mensoetjiken pikiran, dan membaekin hati soepaja bisa toentoet kahidoepan jang tida bertjatjat, boekan sadja dalem perboeatan tapi djoega pada pikiran. Kapan itoe hati, pikiran dan pengartian, atawa pengataoean tentang maksued dan toedjoean hidoe, masih bertjatjat, orang poen tida bisa poenjaken itoe *Tji Sian*, sifat kabaakan jang paling sampoerna.

Buddha soedah pastiken bahoea siapa tida mengeanal itoe Ampat Kabeneran Moelia dan Delapan Djalan Oetama, tida nanti bisa sampeken Nirwana. Khong Tjoe, dalem *Thay Hak* fatsal 7, poen ada bilang : „Tida bisa djadi, kapan pokok atawa akarnja ditelantarkan, poetjoekinja nanti bisa djadi beres. Apa jang tebel djadi tipis, dan apa jang tipis djadi tebel, itoelah belon perna ada.” (KI POEN LOAN, DJI BWAT TI TJA, HOUW IE. KI SE HOUW TJA POK, DJI KI SE pok TJA HOUW, BI TJI TJOE YA).

LEZING-LEZING DI KWAN IM TONG.

Ini oedjar ada mengoendjoek, kapan orang jang hendak mentjari kamadjoean batin tida perhatiken kabersihan pikiran atawa hatinja, tida djaga baek iapoenja moraal, itoelah soedah pasti hasil dari pakerdjaannja tida bisa djadi beres. Begitoe djoega dengan orang jang kedjer segala matjery ilmoe pengataoean atawa kapandean jang tida berfaedah, oepama peladjarin ilmoe gaib dan moedjidjat, sedeng kabersihan moraalnja sendiri tida didjaga, hingga pikirannya masih penoeh terdjedjal dengan hawa nafsoe kainginan jang sia-sia, itoelah soedah pasti bakal alamken gagalan, kerna ia akan berbiloek ka djoeroesan Zwar-te Maggie. Maka saorang jang pande tida maoe siasiaken temponja dengan perhatiken oeroesan tjabang, hanja selaloo mengoesoet dan memegang *pokonja sasoeatoe oeroesan*. Ini poen ada tjotjok dengan Budha poenja pendapatan, bahoea sasoeatoe ichtiar dari maoesia jang boekan ditoedjoeken boeat memberi kasaran dan bebaskan diri dari iketan, itoelah sama djoega meroegiken tempo dan memboeang tenaga dengan pertjoemah.

Didjalankenna toedjoean boeat dapekken itoe kadoedoekan dalem sifat baek jang paling sampoerna, dalem mana orang nanti dapetken katentreman dan pengasoan jang aman, oleh Khong Tjoe dinamaken „*Tiong Yong*,” jaitoe mengadaken *imbangan sampaatengah dengan tjotjok dan sampverna*, dimana segala gontjangan jang timboel dari perasa'an badan atawa pikiran, seperti kasenangan atawa kasoesahan, kasedihan atawa kagirangan, kasajangan atawa kabentjian, kapoeasan atawa kagoesaran dan sabaginja lagi, tida bisa pengaroehin pada dirinja. Inilah ada kaberesan sampoerna menoeroet natuur atawa watek sawadjarnja, dimana tida ada pertentangan satoe apa, hingga itoe *Tiong* boleh dibilang *kadjedjekan*, jang mendjadi akar besar dari mana segala pergerakan dan perboeat-

an telah moentjoel.

Ini imbangan jang djedjek dan rapih dari natuur soedah terganggoe oleh adanja kontak antara manoesia dengen barang loear, jang menjebabken timboelnja roepa-roepa perasa'an, seperti senang, goesar, sedih atawa girang jang membangkitken getaran dan rasa kemaroek. Boeat linjapken pengaroechnja itoe gontjangan jang menimboelken kakaloetan, haroeslah orang insjaf boeat menjamboet menoeroet watesnja jang bener, djangan sampe miring ka salah-satoe fihak. Siapa menoeroetin hati atawa nafsoenja dalem hal menjinta dan membentji, pastilah ia tida bisa pegang lagi itoe imbangan jang djedjek. Maka sasoeatoe orang jang hendak mentjari kateatreman batin haroes mendjaga soepaja iapoenna perasa'an terharoe *tida bekerdja* — tida sèrèt piadanja aken melakoeken perboëatan jang meliwat wates — soepaja tinggal tetep sama rata dan saling mengimbangin, jang djadi djoega *pœsatn ja kad jed jekan batin*.

Ini pengoendjoekan dari fihak Khong Kauw dalem banjak hal ada tjotjok dengen Buddhisme poenja peladjaran tentang Kabangkitan Dengan Berbareng (*Paticca Samuppada*), dimana antara laen-laen ada dioendjoek, lantaran dari kabodoan telah timboel itoe nafsoe kagiatan boeat bergerak, jang komoedian menimboelken kasedaran pikiran jang lahirken peringetan dan toeboeh, jang disertaken anem matjem perasa'an (*Salayatana*). Kapan ini berbagi-bagi perasa'an kena kontak pada apa-apa jang ada di loear, laioe timboel gontjangan atawa sensatie, jang menoeroet gilirannja mendatengken rasa kemaroek atawa katagian aken oelangin poela itoe sensatie; achirnja timboel karapetan atawa poen karenggangan jang berätsal dari rasa bentji dan soeka, sikep mana menimboelken *Karma*, jang menjèrèt pada itoe orang aken saban. saban terlahir poela ka doenia, lantaran mana ia moesti

LEZING-LEZING DI KWAN IM TONG.

kena alamken beroelang-oelang segala kasakitan, kamatian, kadoeka'an, kasedilhan dan poetoesnja harepan jang mendjadi bagiannja samoea manoesia.

Di Dalem peladjaran Khong Kauw tida ada keterangan jang berhoeboeng dengen Karma dan Toemimbal Lahir, tapi ada dioendjoek bagimana itoe kontak dengen barang loear jang membangkitken roepa-roepa matjem perasa'an membikin itoe imbangan jang djedjek dalem batinnja manoesia djadi terganggoe, hingga perloe diambil atoeran boeat saling mengimbangin, dan orang djangan kasih bekerdja iapoena perasa'an badan jang gampang terharoe. Kapan ini bisa didjalanken dengen sampoerna, hatsilnja poen soedah pasti aken saroepa seperti dioendjoek dalem Buddhisme.

Menoeroet philosophie Buddhist, segala apa di ini alam ada bersifat diam dan tentrem; djikaloe sekarang telah moentjoel ini doenia-doenia dengen segala isinja, iteelah ada dari lantaran terdjadinya pergasanan dan pergerakan jang soesah boeat dioesoet atsal-oetsölnja. Oepama itoe api, atawapoen electris, tida nanti bisa moentjoel kapan tida ada pegerakan dan pergasanan. Di dalam logam, kajoe dan laen-laen benda, ada terdapet itoe api, begitoe poen itoe tenaga electris. Kapan sapotong kajoe kereng digosok beroelang-oelang, ia mendjadi panas dan laloe mongaloearin api. Satoe kalih itoe api soedah menjalah, ia bisa datengken kabaekan bagi manoesia kapan digoenaaken satjara bener, oepama boeat penarangan, bikin mateng makanan, atawa angetin kamar di moesim dingin dan laen-laen lagi; tapi djikaloe jang menggoenaken berlakoe koerang hati-hati, itoe api bisa bikin melepoeh toeboehnja, membakar barang dan roemahnja, malah bikin angoes satoe desa atawa kota! Maka segala apa ada bergantoeng atas tjaranja itoe api digoenaaken.

Sabagitoe lama di dalem diri dan pikirannya satoe

orang masih terjadi bentrokan, pergasakan atawa pergerakan jang disertaken segala matjem gontjangan pada perasa'annja, ia tida bisa dapatken katentreman. Maka itoe Buddha poedijken boeat berentiken segala kainginan atawa pegerakan jang berdasar atas hawa nafsoe boeat dapatken senšatie, soepaja dengen begitoe orang bisa terlolos dari libetannja Karma, sedeng Khong Tjoe poedijken boeat mendjalanken Tiong Yong atawa „imbangan sama rata” dalem segala apa, jang membikin itoe pergasakan dan pergontjangan tida berpengaroeh lagi.

Tegesnya, ini doe-a-doea Sengdjin poedijken aken manoesia sabisa-bisa balik kembali ka dalem katentreman aseli atawa bermoela, menoeroesia sifatnya natuur, kerna *disitoelah* adanja itoe kaberoentoengan dan katentreman jang kekel.

Laen dari itoe dalem Buddnisme ada terdapat pedajaran jang dinamain *Via Media*, jaitoe mengambil *Djalanan Tengah* dalem pertjobaan boeat sampeken Nirwana. Itoe Djalanan Tengah dari Buddha ada dimaksoedken aken mentjari kasoejian dengen djangan menjiksa diri, dan djoega djangan orang kedjer kasenangan doenia satjara bodo, kerna doe-a-doea tida nanti memberi hatsil. Dalem atoeran dari pergaoelan, djoega laen-laen kamoeustian jang haroes dilakoeken oleh saorang Budhist, Buddha selamanja mendjaga soepaja orang djangan berlakoe *terlaloe miring* ka satoe podjokan, djangan jadi fanatiek, hanja segala apa koedoë *tjetjok* dengen *pikiran sehat*. Djoestroe ini sikep poen ada sanget dioetamain dalem Khong Kauw, jang mengadjar soepaja orang pernahken diri di tempat jang betoel, dan kapan berdiam di satoe negri asing djangan tentangin adat kabiasaan dari pendoedoek di itoe tempat, djangan koekoeh pada atoeran dan kabiasaan sendiri.

Seperti tadi saja soedah bilang, dalem Khong Kauw

Buddha poenja ampat Kabeneran Moelia.

TENTANG DELAPAN DJALAN OETAMA,
bagian
PERBOEATAN BENER.
XXII.

OLEH KWEETEK HOAIJ.

(Lezing dari Bat. Budd. Ass. di Krenteng Kwan Im Tong, Batavia 2-6-'38, djam 8 sore).

Soedara-soedara,

Sekarang ada dateng giliran boeat saja bitjaraken itoe Djalan Oetama Ka'ampat jang dinamaken Per-

tida ada dibilitjaraken tentang Karma, tetapi dalem salah-satoe oefjappannja Khong Tjoe ada terdapat apa-apa jang mirip seperti kaoem Buddhist poenja artian tentang Karma.

Buddha pernah bilang, siapa lakoekeun kadjahatan, ia moesti terima pembalesan jang tida enak boeat kadjahatannja Ioe, kerña sasoeatoe orang moesti petik boeah dari itoe bibit jang ia banem. Biarpoen ia semboeni di poentjak goenoeng' atawa masoek ka dasarnja laoet jang paling dalem, itoe Karma djelek nanti mengedjer teroes padanja.

Oefjapan jang mirip begini ada terdapat dalem Loen Gie Djilid III, fatsal XIII ajat 2, dimana ada terdapat Khong Tjoe poenja perkata'an: „Barang siapa berboeat kadosa'an pada Thian tiда ada lobang boeat ia bermoehoen ampoen.”

Masih ada banjak lagi laen-laen tjento jang seja bisa oendjoek tentang persama'an antara peladjaran-peladjarannja Khong Tjoe dengan Buddha, dari mana kita bisa liat jang sari dari Khong Kauw dan Hoed Kauw ada saroepa, atawa beräfsal dari satoe pokø. Boeat ini malem saja rasa sabagini soedah tjoekoep, dan bagian jang laen-laen saja harep nanti bisa bitjaraken lebih djaoe di laen tempo.

Selamet malem,

boeatan Benet poenja pantangan ka'ampat, jaitoe jang berhoëboeng dengen menggoenaken minoeman atawa djedjamoe jang bisa membikin mabok atawa loepa ingetan.

Ini matjem pantangan, seperti soedara soedara tentoe masih inget, saja perna bitjarain dengan ringkes dalem salah-satoe lezing jang doeloean; sekarang saja maoe tjoba terangin dengen lebih loeas soepaja kita bisa timbang dan selidikin sampe pada bagian-bagian jang soelit.

Samoea orang soedah taoe, siapa jang dahar, isep, mincem atawa masoekin apa apa ka dalem toeboehnya jang bisa menimboelken mabok, hingga pikirannja mendjadi boetek, itoelah tida boleh dibilang baek, kerna saorang jang lagi *boetek pikiran* boleh dipastikan pertimbangannya tida bisa *djedjek*. Itoelah sebab-nja maka dalem kabanjakan agama itoe perboeatan ada ditjelah, dan malah ada jang melarang sama sekalih orang minoem alkohol, oeparna agama Islam.

Agama Kristen tida melarang orang meminoem anggoer, malah pada padri-padri poen di-izinken, sebab anggoer ada djadi satoe bagian dari oepatjara agama. Tetapi itoe anggoer diminoem satjara saderhana hingga tida bisa menimboelken mabok, kerna agama Kristen, seperti djoega agama Buddha dan Islam, menentangin sanget sama pemabokan, pemandatan dan laen-laen kabiasaan jang merdesak pada toeboeh dan membikin boeteknya pikiran.

Oemoemnya anggepan orang jang kabanjakan, mas-ki sampe insjaf kadjahatannya alkohol, madat, morphine, toeak keras dan sabaginja, tida pandang itoe barang terlaloe berbahaja „djikaloe dipake dengen kira-kira.” Di moesim dingin tida djahatnya minoem satoe doeä glas brendy aken „bikin anget toeboeh.” Kapan dada sesek atawa banjak batoek, satoe doeä tjeplis opium katanja „bisa menoeloeng aken timboel-

LEZING-LEZING DI KWAN IM TONG.

in kalonggaran dan kasegeran ;” djikaloe orang koe-rang tidoer (bo-bin) djoega ada baek di-isepin madat soepaja toeboeh tida kamasoekan „angin djahat”. Itoe arak, apaiagi jang ditjampoerin akar-akaran wangi, serta sabelonnja diminoem di-angetin lebih doeloe, ada *baek sekalih* diminoem satoe doea tjangkir ketjil, saban abis makan nasi, boeat sapoe bersih segala minjak-minjak jang bisa mengganggoe pada peroet ; dan di mana-mana ada ratoesan, brangkalih riboean, orang jang bersedia akèn madjoe sabagi saksi atas kabaekan dan kamandjoerannja sadjoemblah arak obat jang menjemboehin marika poenja penjakit, memberi kasehatan dan kasegeran, malah kafanja orang jang soedah toea dan lojo poen bisa djadi „moeda kombali” dan poenja „kakoeatan” seperti satoe djedjaka ; dan kaloe kita-orang moesti pertjaja boeninja advertentie-advertentie dalem soerat-soerat kabar, orang prampoean jang gaboek bisa melahirken anak, jang soedah baki dan lajoe nanti balik mendjadi „seperti gadis”, hingga ilmoe kapandeannja Professor Voronoff kaliasannja tida saberapa mengheranken lagi, kerna soedah lama sekalih *didoeloein* oleh toekang-toekang bikin arak obat *Tjong Yang* dan laen-laen, jang kamandjoerannja bisa *diboektiken* dari soerat soerat poedjian jang sasoeatoe pendjoeal arak obat bisa tondjolken.

Dalem ka’adaan begitoe, maka tentoe sadja orang banjak djadi merasa sangsi atas kabenerannja itoe pantangan boeat djangan minoem alkohol, kerna kaloe moesti ditoeroet dengen betoel, orang poen tida bisa tarik kafaedahan jang bisa didapet dari itoe segala matjem arak obat jang mandjoer. Boekankah dokter-dokter Europa poen biasa goenaken madat atawa morphine dalem receptnja ? Manakah lebih baek : satoe pemadatan atawa alkoholist jang hidoeper seger dan sehat, atawa jang selaloe berpenjakitan, hidoeper tida berdaja dan beroesia pendek lantaran he-

rentiken kabiasa'annja itoe ?

Soedara-soedara bisa liat, bagimana fihak jang langgar itoe pantangan poen ada poenja *alesan* dan *tjingli* sendiri aken pegang tegoeh kabiasa'annja itoe. Tida ada satoe pemedatan jang *sengadja* hendak boeang oewang boeat kasih oentoeng pada gouvernement djikaloe tida ada satoe sebab jang membikin ia *kepaksia* isep madat; sasoeatoe sobat dari botol pesegi, langganan dari yo-thiam jang djoegal arak obat, bisa tjerita bagimana atsal moelahnja ia „boekan sengadja“ hendak djadi pemabokan, tetapi terdjoeroeng oleh salah-satoe sebab dan ka'ada'an jang „memaksa“, dan ia pegang teroes itoe kabiasa'an soepaja bisa „mendjaga kasehatan !“

Kasoedahannja oleh anggepan oemoem, maski ifoe pantangan ada diakkoe „bener“, tetapi dipandang tida perloe aken toeroetin dengen terliti, dan soedah tjekoep kaloe orang bisa berlakoe „kira-kira“ atawa „mengenal wates.“ Maka sekarang saja minta soedara-soedara poenja pikiran dan pertimbangan : apakah ini anggepan ada bener ?

(Beberapa pendenger menjataken pikirannya. Jang satoe bilang : „Orang isep madat kabanjakan lantaran soeka bergaoelan sama prampoean hina.“ Jang laen bilang : „Itoe anggepan tida betoel, sebab orang jang minoem alkohol atawa madat dengen diwatesin atawa kira-kira, achirnya bisa katoelaran.“ Ada lagi jang bilang : „Orang sakit jang biasa makan obat, oepama aspirin, tida bisa katagian seperti orang jang hendak semboehin penjakit dengen madat atawa arak obat, maka itoe maljem „obat“ ada berbahaya kapan dibiasain boeat dipake sering-sering, biarpoen diwatesin.“).

Sabetoelnuja boeat petjhain ini soeal tida begitce gampang seperti kabanjakan orang ada kira. Kita tida boleh lantes tarik poetoesan, lantaran Buddha,

LEZING-LEZING DI KWAN iM TONG.

Nabi Mohammad atawa laen-laen orang soetji soedah larang, kita orang *moesti toeroet* satjara memboeta dengen zonder ditimbang lagi. Djoega kita-orang tida boleh lantes pilir, lantaran kaloe minoem arak atawa isep madat dengen „kira-kira“ dibilang tida ada bahajanja, itoe pantangan boleh traoesah dipandang terlaloe penting boeat diperhatiken. Dalem doe-a-doea hal, baek jang memegang keras itoe pantangan, atawa poen jang tida maoe terlaloe perdoeliken, bisa ber-boeat kakeliroean djikaloe tida menggoenaken *Pikiran* dan *Pengartian Bener* dalem pertimbanganraja itoe.

Oepamanja, djikaloe kita beräda di satoe tempat jang hawanja sanget dingin — traoesah bitjara di Noord Pool, atawa Zuid Pool, di Europa atawa Tiongkok pada waktoe moesim winter, hanja bilang sadja di salah-satoe tanah pagoenoengan jang tinggi di Java, oepama Diëng atawa Tosari — dan lantaran belon biasa pada hawa disitoe serta tida poenja pakean tjoekoep tebel, kita rasain badan seperti kakoe dari kadinginan, hingga tida bisa kerdjain satoe apa, hanja meroengkoet dan goemeteran teroes meneroes. Dalem ka'ada'an begitoe, apakah dosa dan kasalahannja djikaloe kita minoem satoe doe-a glas brendy ? Saorang jang dalem toeboehnja dapet sakit keras hingga tida tertahan lagi bisa dibikin ringan dengen morphine, sedeng chloroform dan sabaginja, jang djoega membikin „mabok dan loepa ingetan“, ada satoe *peneloeng besar* bagi orang jang hendak di-operatie soepaja tida oesah bersang-sara menanggoeng sakit. Maka boeat orang-orang jang hadepken kaperloean tjara begitoe, kapan menolak itoe barang jang menoeloeng kasangsara'annja, tjoemah lantaran hendak toeroet betoel itoe pantangan, inllah kaliatan sabagi satoe kagêndêngan !

Djoestroe Buddisme boekan agama dari orang-orang fanatic jang toeroet djalanken segala apa dengan memboeta, hanja ini peladjaran meminta pikiran

dan pengartian bener jang melahirken pemandangan eehat, soepaja orang bisa ambil Djalanan Tengah (*Via Media*) jang tida terlaloe miring ka salah-satoe po-djokan. Inilah sebabnya maka Buddha minta soepaja orang djangan pertjaja apa jang ia bilang dan djangan toeroet apa jang ia adjar djikaloe dirasa tida tjotjok sama pikiran dan pendapatan sendiri. Tetapi dengen ini peringatan Buddha boekan maoe bilang apa jang ia adjar tida perlbe ditoeroet, hanja Buddha ingin orang djalanken itoe dengen berdasar atas *pengartian*, jaitoe lantaran *insjaf* pada kafaedahannja, boeat mana orang moesti pake pengartian dan pikiran bener.

Buddha poenja pantangan aken djangan minoem alkohol atawa isep madat, memang ada baek dan perloe sekalih. Djikaloe ada orang jang pikir ia terpaksa tida bisa toeroet lantaran adanja beberapa halangan jang tida bisa disingkirken, itoelah boekan salahnya itoe pantangan. Oepama, itoe kabiasaan dari bangsa Barat aken minoem anggoer pada saban bersantap, atawa orang Tionghoa goenaken arak salagi makán nasi, soepaja bisa sapoe atawa tjoetji segala minjak-minjak, inilah memang ada djoega perloenja, tetapi itoe kaperloean hanja moentjoel lantaran ia-orang *menikan daging jang disertaken banjak minjak*. Djadinja djikaloe kita-orang toeroet pantangan *Djangan Memboenoeh* dan dahar sadja sajoer-sajoeran, itoe kabiasaan meminoem anggoer boeat „tjoetji minjak” mendjadi tida perloe lagi. Lantaran kita *langgar* pantangan jang satoe, maka kita terpaksa moesti langgar djoega pada pantangan jang laen.

Begitoe poen dengen orang jang merasa perloe sekalih saban hari minoem beberapa glas arak obat boeat bikin „koeat badan,” bikin „tambah darah,” bikin „linjap lelahnya kaki tangan,” atawa „toelang mangiloe,” atawa „sakit pinggang” dan sabaginja lagi,

LEZING LEZING DI KWAN IM TONG.

atawa boeat „dapat tenaga” seperti saorang moeda, — ini samoea pokonja ada dari lantaran si lemah tadi soedih *melanggar* Pantangan Djangan toeroetin nafsoe sexuel satjara tida sah atawa meliwatin wates. Djikaioe orang lakoeken perhoeboengan antara lelaki dan prampoean sakedar boeat dapat toeroenan, tida nanti toeboehnya lekas bedjad hingga moesti dibantoe tenaga oleh segala arak Tjong yang dan sabagijna. Djadinja, sekalihpoen betoel itoe arak atawa anggoer diminoem sabagi „obat”, itoe matjem obat tida perloe lagi, kapan kita-orang bisa *djaga badan* soepaja tinggal sehat dengan tida lampiasken nafsöe jang meliwat wates, hanja makan dan minoem jang saderhana, dan dipilih sadja apa jang baek dan berfaedah hingga tida mengganggoe kasehatan toeboeh. Itoe segala daging dan minjak-minjak sabetoelnja tida mengandoeng vitamin begitoe banjak seperti jng terdapet dalem boeah-boeah dan sajoeran. Orang jang biasa makan banjak daging, memang baek minoem anggoer, sebab di dalem sarı dari boeah anggoer ada terdapet itoe vitamin jang ia perloe, hingga salaennja boeat bersihken minjak dan laen-laen kakotoran jang berätsal dari daging, ia bisa tambahan apa jang daging tida bisa adaken tjoekoep goena kasehatan toeboehnya. Tetapi boeat satoe vegetarier atawa saorang tjiatjay menoeroet atoeran Buddha, ia bisa tinggal waras biarpoen saoemoer hidoepr tida minoem satètès anggoer atawa arak obat.

Toentoet kahidoepan jang saderhana di oedara terboeka menoeroet natuur, tida kemaroek makanan enak tetapi dipilih sadja apa jang bisa memberi kasehatan, ada tjara jang paling pasti boeat memelihara kawaras. Dan dalem ini hal sasoeatoe orang jang perhatiken kahidoepan Buddha bisa dapat banjak toeladan. Buddha lebih soeka tinggal diam di dalem kebon-kebon, doedoek dan tidoer di bawah poehoen-poehoen

bersama moerid-moeridnya, jaitoe teroes-meneroes tinggal di oedara terboeka ; tjoemah di waktoe moesim oedjan baroelah marika tinggal di dalem roemah, dalem Wihara. Djoega pakean jang digoenaaken boeat menoetoep toeboeh ada serba tipis, enteng dan longgar, tida mengiket atawa membikin panas pada badan, dengen kaki dan kepala terlandjang atawa tjoemah pake sandal sadja, hingga menambahin pada pri kasehatan. Tjoemah di moesim oedjan Buddha dan moerid-moeridnya ada pake mantel tebel.

Ini tjara hidoe sekarang soedah diakkoe kafaedah-annja oleh ilmoe pengataoean, dan malah di negri-negri Barat soedah moentjoel gerakan *Nudism* atawa hidoe-terlandjang, jang pokonja tida laen dari-pada hidoe menoeroet natuur. Anak-anak, seperti bisa diliat dari atoeran padvinderij atawa kapandoean, ada dididik dan diandjoerin aken hidoe di oedara terboeka, makan dan pake jang saderhana, sedeng itoe kabiasaan memake pakean enteng dan tipis dengen sabagian dari toeboeh tida tertotoep, dipardhang dari fihak kasehatan memang ada lebih baek dari-pada jang terboengkoes rapet, apalagi boeat di negri negri jang berhawa panas, atawa di waktoe moesim panas.

Djoega itoe kabiasaan dari anak-anak moeda djeman sekarang jang tida soeka pake topi kapan berdjalan ka loear roemah, ada tjotjok dengen kabiasaan dari Buddha dan pengikoetnja, jang toetoepin badan sakedar jang paling perlœ boeal mendjaga pri kasopanan, sedeng toedjoeannja jang teroetama ada boeat berlakoe saderhana dan hidoe menoeroet natuur.

Tetapi Buddha, sabagitoe djaoe jang saja taoe, tida perna bitjarain ini atoeran mendjaga kasehatan toeboeh, sebab Buddha sampe taoe apa jang baek dan tjotjok boeat di India bakal tida bisa difjalanken di Thibet atawa Monggolie jang hawanja sanget dingin. Tetapi dengen oetamain *kasaderhana'an* orang lantes

LEZING-LEZING DI KWAN IM TONG.

bisa mengarti, disitoe ada djalan jang paling deket boeat dapetken kasehatan toeboeh hingga orang tida oesah moesti isep madat atawa minoem alkohol boeat „mendjaga kasehatan.”

Sabagi goeroe dari kabidjaksana'an Buddha poenja pakerdja'an ada boeat memberi kasedaran dan pengartian, sebab dengen mempoenjai itoe *pengartian* dan *pikiran bener* orang poen nanti bisa pilih sendiri satoe tjara hidoej jang lebih baek oentoek memeliha-ra kasehatannja. Maka itoe berbagi-bagi alesan jang biasa dimadjoecken aken membenerin kabiasa'an minoem arak, anggoer atawa isep madat, djadi ilang harganja, lantaran berdasar atas *kabiasa'an hidoej jang keliroe*.

Begitoe djoega dengen kita-orang poenja kabiasa-an meminoem anggoer atawa arak di tempat pesta, atawa minoem champagne waktoe ada karaja'an besar; soedara-soedara samoea, seperti djoega saja sendiri, merasa koerang hormat atawa tida manis djikaloë menampik itoe minoeman jang disodorin boeat memberi selamet pada kita poenja sobat jang rajaken shedjiet pernikahan dan sabaginja. Kita-orang moesti toeroet, seperti djoega laen-laen tetamoe, aken minoem goena kaselametannja itoe sobat jang pestanja kita hadlirin. Dan ini perboeanan tida bisa dibilang salah, sebab dengen minoem itoe sagelas anggoer, jang tida mendatengken katjilaka'an apa-apa, kita poen tida oesah langgar atoeran oemoem jang bikin laen-laen orang merasa ketjiwa.

Ini pelanggaran poen boekan sebab itoe pantangan keliroe dan boekan salahnya kita orang jang seperti tetamoe maoe oendjoek hormat dan bikin senang pada si toean roemah. Jang bersalah ada itoe maatschappy, itoe siahwee atawa pergaoelan-hidoep, jang anggep mendjadi satoe *kamoestian* kapan bikin pesta, karaja'an dan laen-laen jang bersifat menggirangken,

aken sedia champagne, anggoer atawa brendy. Ada apakah salah atawa tjetjatnja djikaloe orang memberi selamet dengen minoem sadja Aer Blanda, Limonade, atawa Thee?

Saja sering hadlirin orang-orang priboemi bikin pesta dimana tida ada satoe tètès alkohol, dan orang tida minoem laen dari thee dan koffie, tapi toch kagirangan dan kagoembirahannja tida koerangan dari-pada karaja'an jang, oepama kata, disertain „bandjir Champagne”!

Maka kapan ada terdjadi satoe hal dimana orang merasa *terpaksa* moesti melanggar atawa tida bisa toeroet dengen betoel itoe pantangan dari Buddha, itoe kasalahan boekan dari keliroenza itoe pantangan, hanja dipengaroehin oleh satoe ka'ada'an jang moentjoel dari koerang bener dan tida sampoernanja kita-orang poenja kahidcepan dan adat kabiasaan dalem pergaoelan.

Soeal menggoenaken morphine, madat atawa obat boeat meloepaken (anaesthetisch) seperti chloroform dan sabaginja boeat mengoerangin atawa bikin orang tida merasa sakit, teroetama waktoe di-operatie, ini-lah tida termasoek dalem Buddha poenja pantangan, sebab boekan dari *maoenja* itoe orang sendiri, hanja ada atoeran dari dokter jang hendak toeloeng semboehken atawa ringanken penjakitnja. Madat dan alkohol, maka mendjadi begitoe berbahaja, ada dari lantaran orang j ng kaseringan pake bisa kemaroeck dan ketagilan, dan kapan satoe kalih soedah kena ditjengkerem, ada amat soesah boeat terlepas kombali. Tetapi itoe obat-obatan jang digoenaken oleh thabib, maski terdiri dari bahan jang sama, ada diwatesin begitoe roepa hingga tida bisa menerbitkan bahaja apa-apa pada si sakit, kerna dikasih sakedar jang perloe boeat menjemboehin atawa meringanin penjakitnja.

Djikaloe satoe orang diloloh sampe mabok soepa

LEZING-LEZING DI KWAN IM TONG.

berani toeroen mengibing di tempat pesta dengan zonter maloe lagi, inilah ada perboeatan salah ; tetapi djikaloe thabib-thabib goenain morphine atawa anaesthetisch boeat bikin satoe orang jang kesakitian merasa ringan atawa tida mendoesin sama sekalih wak-toe dilakoeken operatie atas toeboehnja, inilah ada bersifat *menoeloeng* jang mendatengken kabaékan. Antara bikin orang djadi *ilang maloe* dan *ilang sakit*, inilah ada djaoe bedanja, maski alat jang dipake ada ampir sama.

Soeal menggoenaken brendy atawa arak aken menolak hawa dingin tida selamanja ada sanget perloe, sebab orang bisa bikin anget dirinja dengan api atawa berdiam dalem tempat jang tertotoep rapet, pake pakean tebel, dan sabaginja. Kapan sasqeatoe orang priboemi jang tinggal di Diéng atawa Tosari moesti angetin diri sama brendy atawa arak, nistjaja iaorang soedah lama bangkroet. Di tempat dingin dimana orang Tionghoa atawa Europa moesti pake badjoe tebel, saja liat orang priboemi bisa djalan dengan telandjang badan atawa pake badjoe tipis, malah mandi berendem dalem aer jang seperti ijs. Inilah lantaran marika soedah biasa hidoe meneroet natuur, jang membikin toeboehnja koeat aken menjalak hawa dingin. Ada banjak tempat dingin dimana orang tida bisa dapet alkohol boeat bikin anget toeboehnja, tetapi pendoedoekna bisa hidoe sehat zonter djadi kakoe kadinginan. Maka itoe pikiran bahoea brendy atawa arak ada *sanget perloe* boeat „bikin anget toeboeh,” tida selamanja moesti dianggep bener, dan orang jang koekoeh berpikiran begitoe kabanjakan memang soedah ada poenja kasoeka'an pada alkohol dan goenaken itoe alesan „tolak dingin“ sakedar boeat *iringin kasoeka'annja*, seperti djoega halnja pemadatan, jang anggep segala matjem penjakit bisa *disemböehin* sama madat, sakedar boeat oendjoek

itoe kabiasa'an isep madat ada djadi *kaperloean besar* jang tida bisa *disingkirken*.

Dengen ini samoea keterangan saja maoe oendjoek, itoe berbagi-bagi alesan jang orang madjoeken boeat benerken perboeatan jang melanggar pada itoe pantangan, tida ada begitoe koeat seperti jang orang kira. Siapa toentoet penghidoepan saderhana dan menoeroet natuur, serta tida soeka ikoetin pada segala adat kabiasa'an daem pergaoelan hidoeplang koe-rang baek, bisa tinggal sehat dan waras zonder konal madat, arak obat dan sabaginja lagi. Kaloe ja masih soeka toeroet adat-kabiasa'an oemoem, dan toentoet kahidoepan jang bikin toeboehnja lekas lemah, koe-rang darah, dan sabaginja lagi, memang terkadang ia masih perloe sama itoe barang, tetapi ini boekan dari salahnya Buddha poenja pantangan.

Itoe alesan, kapan orang bisa „kira-kira” atawa „mengenal wates” itoe alkohol atawa madat dan sabaginja tida menimboelken bahaja, tida selamanja ada bener, sebab kapan diselidiki lelakonnja sasoeatoe pemadatan atawa pemabokan, nanti kadapetan sabagian paling besar tadinja tjoemah isep atawa mji-noem sedikit dengen pertjaja jang dirinja *tida bisa katagian*. Tetapi nafsoe manoesia ada begitoe woepa hingga seringkalih kabober dengen tida tertahan lagi, teroetama antara orang jang bertabeat lemah. Maka biarpoen *tjoemah sedikit* dan *berwates*, ada lebih selamet kapan orang bisa diaoehin itoe madat atawa alkohol, katjoeali boeat digoenain sabagi obat, begitoe poen kapan soedah tida ada laen obat jang bisa menoeloeng.

Dalem kwaliteit sabagi obat, itoe madat atawa alkohol hanja menoeloeng kaloe dipake boeat kadang-kadang sadja, kapan *betoel-betoel* sakit, boekan moest di-isep atawa ditenggak satiap hari daem tempo jang tentos, sebab alkohol dan madat ada termasoek da-

lem kalangan *ratjoen* jang bisa meroesak toeboeh dan pikiran, hingga sabalikna dari „sehat dan waras,” itoe orang jang soedah katagian malah toeboehnya djadi *rœsak*, *lemah*, pikiran *boetek*, dan membuat linjap djoega pribodei. Tentang ini hal soedara-soedara samoea soedah taoe hingga tida perloe saja bitjaraian pandjang lebar. Oleh Volkenbond, dan samoea bangsa-bangsa jang sopan, ada di-ichiarken boeat membasmi bahaja madat dari doenia, sedeng di Amerika Sariket dan beberapa negri laen soedah perna ditjoba boeat basmi alkohol. Tetapi itoe pertjøba'an sampoe sabagitoe djaoe telah gagal, sebab manoesia masih belon bisa tahan nafsoe dan tida tjoekoepl mengarti pada bahajana. Maka itoe di sabelah wet negri ada perloe diambil tindakan batin dan moraal boeat bikin orang mendoesin kapentingannja menjingkir dari segala minoeman atawa djedjamoe jang bisa membuat mabok, loepa ingatan dan jang bisa menimboelken katagian. Maka semingkin banjak orang jang mengarti baek dan indahken itoe pantangan ka'ampat dari Buddha, ini matjem bahaja jang sakean lama telah meroesak begitoe banjak penghidoepan dari manoesia dan menjangsarkan banjak roemah tangga, ada harepan nanti lebih lekas terbasmi.

Tida satoe orang bisa mempoenjai pengartian dan pikiran bener; tida ada jang nanti bisa bitjara bener; tida ada satoe manoesia aken sangoep indrek itoe djalanen aken berlakoe bener, *kapan ia kasih dirinja dipengaroehin oleh madat, alkohol dan laen-laen barang jang membuat ingetannja djadi gelap dan boetek.*

Maka itoe, soedara-soedara, kita orang selaloe haroes inget di hati pada bagian katima dari itoe *Panca Sila* (Lima Pantangan) dari Buddha, dan saban-saban oetjapken itoe perdjandjian jang, dalem bahasa Pali,

Philosofie Buddhist tentang Kalahiran dan Kamatian.

OLEH BHIKKHU NARADA.

(*Samboengan nomor jang laloe*).

Sasoedah memberi keterangan dengen ringkes sebab dari timboelnaja Sansara, jang pokonja ada berdasar dari pikiran jang bersifat samar dan soeker dimengarti, sekarang kita sampe pada laen soeal jang tida koerang menariknja, jaitoe jang berhoeboeng dengen riñtakan pengabisan dari kahidoepan, tentang mana Buddhisme ada sebabken terdjadinya kamatian pada salah-satoe dari ampat lantaran seperti berikoet:

(1). Abisnya itoe tenaga dari Karma jang Menjoe-boerken (*Djanaka Kerma*) jang membangkitken kalahirannja itoe orang (*Karmakhayo*). Oemoemnja kaoem Buddhist ada taro pertjaja bahoea itoe pikiran, kamaoean atawa kainginan jang sanget keras sakama itoe orang masih hidoep, mendjadi sanget penting dan

ada begini :

Soera-meraya-mudja-pamadatthana veramani sikhapadam samadiyami.

Dalem bahasa Tionghoa Hokkian :

Gwa Tjoen Sioe Kai Loet, Poet Hoan Lim Tjoet Kip Ba Tjoei Phin.

Melajoenja :

Akoe berdjandji aken perhatiken pantangan boeat djaoehin segala minoeman atawa djedjamoe jang bisa membikin mabok dan boetek ingetan.

Oetjapkenlah ini perdjandjian di waktoe meditatie dengen beroelang-aelang, sampe masoek betoel di dalem hati. Dengan begitoe kita selama-lamanja aken terbebas dari itoe pengaroehnja dari madat dan alkohol jang meroesak, hingga tida bisa mengganggoe kita poenja tosdjoean aken *Berlakoe Bener*.

Selamat malem !

PHILOSOFIE BUDDHIST TENTANG KAMATIAN

berkoeasa pada sa'at ia ampir mati dan mendjadi djoeroengan dari iapoenja kalahiran jang aken dateng. Dalem sa'at jang ia goenaken pikirannja boeat pengabisan ada hadlir satoe bijang atawa soember tenaga jang boleh djadi ada lemah atawa poen koeat. Kapan soember dari itoe tenaga Karma jang Menjoeboerken soedah llnjap, pakerdja'an dari itoe benda-benda jang teratoer dalem mana itoe tenaga-kahidoepan dibikin djadi bertoebolah, poen aken herenti, dan malah ini kamandekan jang mendatengken kamatiian bisa terjadi pada sabelonnja itoe orang beroesia toea.

(2). Sampenja itoe tempo boeat hidoe (Ayukkhaya). Apa jang oemoemnjia dipandang sabagi kamatiian sawadjarnja lantaran beroesia tinggi, boleh dimasoekken ka dalem ini golongan. Menoeroet Buddhism, kahidoepan manoesia ada terbagi dalem beberapa lapisan alam, dan pada itoe masing-masing lapisan ada ditetepken satoe wates jang pasti dari itoe orang poenja oesia. Dengan tida perdoeli pada itoe tenaga Karma jang masih haroes didjalanken, ia poen moesti alamken kamatiian kapan itoe wates dari iapoenja oesia soedah disampeken. Boleh djoega ditambahin keterangan lagi, djikaloe itoe tenaga dari Karma ada sanget koeat, pengaroechnja poen bisa berwoedjoet poela dalem itoe lapisan alam atawa di beberapa alam jang lebih tinggi seperti dalem halnja golongan dewa-dewa.

(3). Abishja itoe tenaga Karma jang Menjoeboerken berbareng dengen sampenja wates dari tempo-kahidoepan (Ubhayakkhaya).

(4). Pakerdja'annja Karma jang leblih koeat (Upatjedaka) jang dengen mendadak bikin terpoetoes itoe Karma jang menjoeboerken sabelon itoe orang sampe di wates dari iapoenja kahidoepan. Tenaga menentangin jang lebih koeat bisa pegatin djalanin dari

Kabar dari Batavia Buddhist Association.

Berhoeboeng dengen sakitnya Sienshe Lin Feng Fei, maka lezing jang hendak dibikin di Krenteng Kwan Im Tong pada tanggal 10 November soedah dittoenda, dan pada tanggal 17 November itoe lezing dibikin dalem krenteng Kwan Im Tong Niko di Prinsenlaan No. 70, dimana ada berhadir djoega beberapa njonja-njonja dan nona-nona.

Salandjoetnja, sampe soedah diatober satoe perobahan jang tetep, boeat samentara waktoe itoe lezing-

anak-panah jang lagi melajang dengen santer dan bikin ia djatoh ka tanah. Begitoe poen dengen tenaga Karma jang sangat tegoeh dari tempo jang laloe, bisa djoega melinjapken itoe bibit kakoeatan jang di-dapat oleh itoe orang pada sa'at ia memikir boeat pengabisan dalem kahidoepannja jang doeloe, dan laloe meroesak itoe orang poenja soemanganget kahidoepan. Kamatiannya Dewadatta, itoe Judas dalem Buddhisme, ada dari lantaran bekerdjanja itoe *Upatjeda Karma* jang ia lahirken dalem itoe kahidoepan jang ia sedeng liwatin.

Itoe tiga tjara jang pertama dari sebabnya kamatian, kapan digaboeeng saanteronja, dinamain *Kalamarana* (kamatian menoeroet temponja), dan itoe satoe jang paling belakang (No 4) diseboet *Akalamarana* (kamatian belon temponja). Oepama, satoe lampoe jang dinjalahken sama minjak bisa padem oleh lantaran salah-satoe dari ini ampat sebab-sebab, jaitoe: abis soemboenja, abis minjaknya, abis dengen berbareng itoe soemboe dan minjak, dan oleh sebab jang dateng dari loear, seperti dari tioepannja angin. Kamatian manoësia poen bisa disebabken tjara begitoe djoega, menoeroet itoe ampat lantaran jang ditoe-toekan di atas.

(Ada berikoetnja).